

Reuter, Fritz: Herr Kreihenbom up Holtenhagen (1842)

1 Herr Kreihenbom up Holtenhagen,
2 De röppt sick Korl Smidten 'ran
3 Un seggt: »Korl, in den negsten Dagen,
4 Denn fang wi an tau decken an,
5 Weitst du woll nich kein Deckelweden?«
6 Korl was bekannt bi all un jeden
7 As so'ne Ort von Holtscheni;
8 Hei arbeit't woll, doch je nah dem
9 Bedrew hei en Geschäft dorbi
10 Mit Hakenkrümmel, Ledderböm,
11 Mit Bandstock un mit Bohnenschächt,
12 Un würd'n in Frühjohr Arwten leggt,
13 Denn künn de Utsat nich gelingen,
14 Korl müßt de Arwtstrük dörtau bringen.
15 »je«, seggt hei, »Herr, von Deckelweden,
16 Dor is hir 'rüm nich vel tau reden,
17 Up Ehren Fell'n, dor stahn jo kein.«
18 »dat weit ick«, seggt Herr Kreihenbom,
19 »doch heww ick nilig fluggs weck seihn
20 Tau Golchen, längs den Wischensom,
21 Du weitst woll, bi den Oberförster –
22 Doch, Korl, hörst du, ick segg dat man,
23 Wat gell'n uns frömde Weden an!
24 Ick gew för't Dusend di sös Gröschen,
25 Un's Winters kannst du bi mi döschen.
26 Na, seih doch mal so'n beten rüm.«
27 »je«, seggt Korl Smidt, »dat is woll slimm«,
28 Un geiht. Indeß den annern Morgen
29 Ward hei en Dusend ran besorgen.
30 Na, schön! Herr Kreihenbom, de seggt:
31 »nimm man din Wedenbund un legg't
32 Herinne in dat Wagenschur,
33 Un hörst du, Korl, dat't keiner süht!«

34 So geiht dat nu 'ne ganze Tid.
35 All Morgens drögg't herin in't Dur
36 Uns' Korl en frisches Bund un stellt
37 Dat rinne in dat Wagenschur;
38 All Morgens kriggt hei ok sin Geld.
39 »nu is dat naug! Nu kân wi decken,
40 Nu hewwen wi Weden naug taum Binnen.«
41 Je ja! je ja! – In allen Ecken
42 Is blot ein einzigst Bund tau finnen.
43 »wo, Dunnerwetter! Na, is dit en
44 Entfahmten Streich! Na, raupt mal Korl Smidten!«
45 Na, Korl, de kümmt. »Wo sünd de annern Bün'n?
46 Dor is jo blot
47 »je, Herring«, lacht Korl Smidt un seggt:
48 »dat ein heww'ck ümmer wedder bröcht.
49 Ob ick s' den Oberförster nem
50 Oder Sei, dat dücht mi ganz egal;
51 Denn stehlen müßt ick s' doch einmal,
52 Un dit was mi so schön bequem.«

(Textopus: Herr Kreihenbom up Holtenhagen. Abgerufen am 23.01.2026 von <https://www.textopus.de/poems/52360>)